

李文恭公遺集

李文恭公文集序

仲雲黼堂兩世兄校刊

文恭公奏議詩集既成復裒輯遺文若干卷將並梓之抑何其用心之勤也夫孝子所以不沒其親者豈有已哉大而繫乎天下

國家小而至於禽魚花木遠之
極乎舟車萬里近之不出閭巷
釣游凡可以繼志述事脩舉先
人未竟之緒者必不靳竭其力
殫其思以求快然而無憾矧夫
手澤之所在散失之所慙遺而

忍使之零落湮沈不加愛惜可乎
昔揚子雲太元法言付之門人司
馬長卿遺書僅存封禪後世有
心者未嘗不因之感喟此龍門蘭
臺之能世其學而唐有許公之手
筆宋有眉山之文章所以擅美

千古也雖然吾

師所重者顧不在此而仲雲昆
季之用心亦不止於是也宋范忠
宣守文正之家法一以堯舜禹湯
文武之事輔助君德至論新法
固顧時忌章疏激切不合則去

猶以天下為己任之心也豈止麥
舟助喪一節為能善體其親心
耶朱文公之子在位非不顯濟
美無聞貽玷先德不免有賣卻
武夷山之誚極盛之後尤難為
繼仲雲昆季得勿於斯兢二乎

吾於其慎寶先集克紹前徽而
知其能不愧於忠宣也然而吾
師之所垂裕者遠矣

同治四年春三月彭崧毓敬識并書

李文恭公文集總目

湘陰李星沅石梧著

男
概
櫬
編次

卷一 散體文

復李海帆先生書

上雲麓外舅書

重刊痘疹會通序

代

陳柳坪幼幼全書序

代

猶母吳孺人六旬晉二壽序

代

張樸齋先生八十壽序

四川鄉試進呈錄序

湘潭郭氏閨秀集序

梧笙館聯吟初輯序

簪花閣遺稿序

紅薇吟館遺草序

澹香閣詩存序

聽濤園古文序

玉池山樵遺稿序

周石帆遺稿序

雨福山房遺稿序

道南淵源錄序

李氏支譜序

張詩舫中丞關中集序

卷二 散體文

胡紹傳先生傳

張樸齋先生傳

張篤齋先生家傳

元配郭恭人行畧

羅君荆畦墓誌銘

通奉大夫候補三品京堂前貴州布政使李公墓

誌銘

承德郎邵陽縣學訓導張公墓誌銘

元配郭恭人壙誌銘

黃忠端公手札跋

五戒

卷三

駢體文

寄蔡雲帆明經書

上陶雲汀夫子書

上陶雲汀夫子書

上陶雲汀夫子書

上李海帆先生書

復李海帆先生書

復宗蓉舫明府書

謝楊芝樵啓

索楊芝樵醢肉啓

謝林小牧啓

譚醒漁詩序

秦牛魯春燈曲序

卷四 駢體文

王律清先生六十壽序

湯松亭先生六十壽序

勞母劉太安人七十壽序

賀母陳太夫人六旬晉二壽序

張母支太安人六十壽序

代

聶母康太恭人八十壽序

代

陳雨峰鎮軍秋哨圖詩跋

代

吳瓊仙遺稿跋

請祀康太僕鄉賢祠揭

代

祭唐母王太恭人文

代

卷五

滇南軍書

蔭興堂提軍

蔭興堂提軍

蔭興堂提軍

蔭興堂提軍

蔭興堂提軍

蔭興堂提軍

蔭興堂提軍

李子廉鎮軍黃惺溪觀察

李子廉鎮軍黃惺溪觀察

黃惺溪觀察

黃惺溪觀察

蔭興堂提軍

普安園廉訪

寶篋谷太守

寶篋谷太守

黃惺溪觀察

蔭興堂提軍

普安園廉訪

普安園廉訪

蔭興堂提軍

卷六 滇南軍書

黃惺溪觀察

蔭興堂提軍

黃惺溪觀察

蔭興堂提軍黃惺溪觀察

李子廉鎮軍

寶篋谷太守

蔭興堂提軍黃惺溪觀察

普安園廉訪

黃惺溪觀察

蔭興堂提軍黃惺溪觀察

蔭興堂提軍黃惺溪觀察

黃惺溪觀察

蔭興堂提軍黃惺溪觀察

蔭興堂提軍黃惺溪觀察

蔭興堂提軍黃惺溪觀察

黃惺溪觀察

蔭興堂提軍

黃惺溪觀察

黃惺溪觀察

普安園廉訪

蔭興堂提軍

蔭興堂提軍

卷七 滇南軍書

陰興堂提軍黃惺溪觀察

陰興堂提軍黃惺溪觀察

陰興堂提軍黃惺溪觀察

陰興堂提軍黃惺溪觀察

普安園廉訪

陰興堂提軍黃惺溪觀察

黃惺溪觀察

普安園廉訪

黃惺溪觀察

李子廉鎮軍

蔭興堂提軍黃惺溪觀察

蔭興堂提軍黃惺溪觀察

蔭興堂提軍

黃惺溪觀察

蔭興堂提軍

蔭興堂提軍

蔭興堂提軍

卷八

滇南軍書

黃惺溪觀察

黃惺溪觀察

普安園廉訪

黃惺溪觀察

蔭興堂提軍

黃惺溪觀察

蔭興堂提軍李子廉鎮軍

黃惺溪觀察

蔭興堂提軍李子廉鎮軍

黃惺溪觀察

黃惺溪觀察

黃惺溪觀察

黃惺溪觀察

黃惺溪觀察

蔭興堂提軍

蔭興堂提軍李子廉鎮軍黃惺溪觀察

蔭興堂提軍李子廉鎮軍黃惺溪觀察

黃惺溪觀察

蔭興堂提軍

黃惺溪觀察

蔭興堂提軍

黃惺溪觀察

蔭興堂提軍黃惺溪觀察

黃惺溪觀察

黃惺溪觀察

蔭興堂提軍

黃惺溪觀察

黃惺溪觀察

蔭興堂提軍

黃惺溪觀察

卷九 粵西軍書

勞辛陔中丞

徐仲紳制軍

駱額門中丞

向欣然提軍

向欣然提軍

徐仲紳制軍

向欣然提軍

向欣然提軍

徐仲紳制軍

勞辛陔中丞

向欣然提軍

向欣然提軍

楊中貺廉訪

駱額門中丞

楊中貺廉訪

林可舟觀察

向欣然提軍

勞辛陔中丞

勞辛陔中丞

楊中貺廉訪

卷十 粵西軍書

徐仲紳制軍

徐仲紳制軍

向欣然提軍

楊中貺廉訪

勞辛咳中丞

向欣然提軍

向欣然提軍

楊中貺廉訪

向欣然提軍

向欣然提軍

周敬修中丞

楊中貺廉訪

向欣然提軍

勞辛陔中丞

卷十一 粵西軍書

勞辛陔中丞

向欣然提軍

勞辛陔中丞

勞辛陔中丞

向欣然提軍

楊中貺廉訪

周敬修中丞

向欣然提軍

向欣然提軍

周敬修中丞

向欣然提軍

徐仲紳制軍

吳仲銘方伯

勞辛陔中丞

向欣然提軍

楊中貺廉訪

周敬修中丞

向欣然提軍

周敬修中丞

周敬修中丞

周敬修中丞

卷十二

粵西軍書

向欣然提軍

周敬修中丞

吳仲銘方伯

向欣然提軍

向欣然提軍

周敬修中丞

楊中貺廉訪

周敬修中丞

徐仲紳制軍

吳仲銘方伯

向欣然提軍

楊中貺廉訪

向欣然提軍

向欣然提軍

向欣然提軍

徐仲紳制軍

向欣然提軍

周敬修中丞

向欣然提軍

楊中貺廉訪

向欣然提軍

卷十三 粵西軍書

楊中貺廉訪

向欣然提軍

楊中貺廉訪

向欣然提軍

向欣然提軍

向欣然提軍

徐仲紳制軍

向欣然提軍

向欣然提軍

向欣然提軍

周敬修中丞

周敬修中丞

向欣然提軍

向欣然提軍

周敬修中丞

周敬修中丞

向欣然提軍

周敬修中丞

向欣然提軍

卷十四

粵西軍書

周敬修中丞

周敬修中丞向欣然提軍

周敬修中丞向欣然提軍

向欣然提軍

周敬修中丞

向欣然提軍

周敬修中丞向欣然提軍

周敬修中丞

周敬修中丞

周敬修中丞向欣然提軍

周敬修中丞向欣然提軍

徐仲紳制軍

周敬修中丞

周敬修中丞向欣然提軍

周敬修中丞

周敬修中丞

周敬修中丞

向欣然提軍

徐仲紳制軍

周敬修中丞

周敬修中丞向欣然提軍

卷十五

粵西軍書

周敬修中丞

周敬修中丞

向欣然提軍

周敬修中丞

徐仲紳制軍

向欣然提軍

周敬修中丞

周敬修中丞

周敬修中丞

向欣然提軍

向欣然提軍

周敬修中丞

向欣然提軍

徐仲紳制軍

周敬修中丞

周敬修中丞

周敬修中丞

徐仲紳制軍

周敬修中丞

周敬修中丞

卷十六 粵西軍書

徐仲紳制軍

向欣然提軍

向欣然提軍

周敬修中丞

周敬修中丞

向欣然提軍

周敬修中丞向欣然提軍

周敬修中丞

周敬修中丞

烏遠芳都護

徐仲紳制軍

周敬修中丞

烏遠芳都護

向欣然提軍

周敬修中丞

向欣然提軍

周敬修中丞

周敬修中丞

周敬修中丞

徐仲紳制軍

李文恭公文集卷一目錄

湘陰李星沅石梧著

男 櫟 榛
栢 桓 編次

散體文

復李海帆先生書

上雲麓外舅書

重刊痘疹會通序

代

陳柳坪幼幼全書序

代

猶母吳孺人六旬晉一壽序

代

張樸齋先生八十壽序

四川鄉試進呈錄序

湘潭郭氏閨秀集序

梧笙館聯吟初輯序

簪花閣遺稿序

紅薇吟館遺草序

澹香閣詩存序

聽濤園古文序

玉池山樵遺稿序

周石帆遺稿序

雨福山房遺稿序

道南淵源錄序

李氏支譜序

張詩舫中丞關中集序

復李海帆先生書

小春望後祇奉鈞禽暨鈔示函藁申誦反復不忍捨懷
自顧何人猥蒙嘉許深愧名浮於實益歎大君子宏獎
之雅殷垂下士輒感激思奮也星沅客游半天下矣聞
當世名公卿謹心識弗敢忘上年正月道經吳會從雲
汀中丞座間側聆厚甫觀察亟稱公賢爲傾慕者久之
不浹歲而大公祖大人以天子命來守永陽下車之初
整紛剔蠹脩舊起廢不動聲色庶務咸理如春風之嘘

枯吹生草木無知而暢茂條達盎盎然月異歲不同也
夫永陽凋敝甚矣其地連嶺粵其俗雜苗獠其土風樸
而不文其民習怠而又悍今則詩書之澤比戶油然而
情者勤爭者讓邪者正獄訟衰息盜賊不行父老詠歌
嬰孺煦育當時觀聽望深莫不服公之正己以正人也
屬吏中有可信者有可用者有可用而不可信者有可
信而不可用者蓋善事與畏事害相等而能吏與循吏
效各殊惟公以身脩爲準式以民望爲權衡以黜陟賢

否爲鞭策寬緩者激厲之而老成期於振作銳進者裁
抑之而剛敢進以和平用其才不騁其才信所守以拓
所守他日宰執天下鼓舞人材不當如是耶宜乎永人
士羣上三遷之祝而私幸一年之借也星沅不敏夙冀
有所造就以正有道而質地限之境遇限之詞章小技
又限之學術無所底堂奧無所窺誠不足爲當塗重然
伯樂一過冀北雖駑駘齷齪亦望騏驎而奔終不敢少
自暴棄願以副知遇於萬一滌樓援例之始其才可惜

其財亦可惜故強沮之比數以書稱道盛德審與滌樓
同邀刮目薛卞之門玉劒長價獨星沅遠在千里延頸
企踵怒如調飢且羨且妬辱藻問矜飾敢復盡其所欲
言且盡其所不必言惟執事憐其狂愚而教誨之幸甚
幸甚

上雲龍外舅書

秦中古帝王都被山帶河天府之國鄠縣始置自漢邠
詩註曰陸海班孟堅亦稱郊野之富號爲近蜀其土地
肥饒民氣敦樸雅有豐岐遺韻外舅以和平忠厚之心
數豈弟慈祥之化而適當農桑竹木之鄉天道之報施
寓焉仕途之順利占焉俗美化行可不三月而治爲大
人慶兼爲鄠人慶也地方官坐擁百里父母斯民凡民
之衣食若何禮俗若何性情好惡若何皆須詳審默識

熟慮深籌俾之息息相關若保赤子欲安良必先除暴
欲興教必先止邪法使民畏而不可偏恩使民感而不
可狎以渾厚者處己而用必精明以樂易者待人而體
必嚴肅邇言所必察而不授宵小以權成見所必祛而
不爲浮游所惑無輕聽以撓兼聽無溺情以失平情惟
果斷者罔艱當大事則任吾敢惟堅確者有守厯眾變
始識吾權寬以御下而才無可用者去敬以事上而事
有可法者親心不設城府而坦率必防窺伺之漸心不

藏逆億而鎮靜必絕欺詐之乘利祿淡而官長無所挾
持言語慎而同僚無所指摘無急差徭以省追呼之擾
無輕議罰以遠納賂之嫌與士言詩書與農言稼穡則
民情不隔而疾苦周知良民用薄刑莠民用重典則民
志不頑而懲創足戒近今以來循吏能吏之大凡不越
乎此至於潔己以奉公和衷以集事周詳以聽訟廉謹
以宅躬銳心力以設施絕耆好以壹志則我外舅所自
信亦同里人所共信者無俟小言詹詹也甥不敏重辱

恩遇於今十年徒以賦性剛簡志遠學疎未獲尺寸以
自效而循陔愛日將母爲懷復不能重繭累胝遠走數
千里爲泰山涓埃之助此心良多缺然謹就聞見所及
覩縷陳之亮盛懷不我遐棄也

重刊痘疹會通序代

夫活人之道與活國同人當疾痛顛連輒仰首呼號籲
醫者以求活庸醫過其前視若盲行若倨投劑若水火
其難活者百無一活矣卽不難活者亦十無二三活則
民命之大可閔也而痘疹尤甚痘疹之患多於童牙所
始不具詳治法亦散見各家靡由折衷以歸於當惟盱
江曾氏嘗輯痘疹會通一書詳審可據惜板存京師外
間罕有覲者理問費君 偶獲原本遂重刊以廣其

傳蓋誠念天地之好生而又知大生廣生之難莫如時
氣之流衍嬰兒之阽危所親者至無可援手也乃惻然
爲此此亦仁人君子之用心矣康誥曰惻隱乃身又曰
如保赤子 行將宰大邑法循良尙其擴充此心以
爲民父母噢咻疾苦愛育恩勤而使邊陲之氓熙熙然
壽且孳焉斯又予所厚望也夫

陳柳坪幼幼全書序

代

國家建置官吏自方伯連帥下逮守令丞尉皆以養斯民而已夫民之待養猶嬰兒之待哺其或疾痛慘怛則必噢咻而顧復之以代其口之所欲言與夫力之所難致俾無不得其所民於是壽且孳矣道光甲申予忝知沅陵事時陳柳坪少府亦以需次同郡公退之暇出所鐫廣達生篇及莊在田福幼遂生二篇以贈予覽之瞿然興也竊嘗謂保赤之道與保民同要在爲父母者心

誠求之體天地好生之德使之各安其生又深明夫蓄
害之所由生以無戕賊其生栽者培之萌者達之弱者
扶之植之母操若濕薪母苛若猛虎母握苗以助長母
芻牧不得而不救陰陽相劑訢合以時煦嫗覆育不殞
不夭彼論主腴削而束縛馳驟至於急則敗者是直舉
襁褓而投之水火也其不爲庸醫之殺人也亦鮮哉
今陳君豈弟慈惠惻隱乃身其保民也如保赤而其保
赤也如保民惻然念孩蟲飛鳥生生不息而嬰兒者反

莫之援手也用輯是書首先捐刻其言約其用該其理
至常而貞諸久令山陬水澨比戶編摩無夭折之患有
滋息之繁造福黔黎何可以億萬千計昔陸宣公晚歲
家居偶得醫方輒手自鈔錄曰此亦活人之一術也陳
君亦猶是焉矣予深嘉其意謹志數語於簡弁分資刷
印以廣其傳世有樂善如陳君者覩是書而欣慕慨歎
遠近流衍將益傳之無窮而凡父母斯民者羣以保赤
之心爲心暑雨祁寒親若同體幸無類秦越人之肥瘠

也此又同志所交勉者夫

猶母吳孺人六旬晉二壽序

代

青圃明經同年客京邸數歲風雨過從樂數晨夕爲述
年伯母吳孺人淑德綦詳 心肅焉不敢諼也今夏

初青圃南旋稱壽于其行敬以誌之方孺人之來歸也
年伯聽泉先生以名孝廉銳意上第公車連轡往復春
明屢不得志於有司則橐筆戎行指麾戈馬慨然有傅
介子班定遠之志家餘儋石酌盈劑虛盡以屬諸閭內
孺人當之秩然也旣而偕任貴筑貴筑吾黔之都會英

流雲集髦俊鋒起廣文門庭談經問字者踵武不絕聽
泉先生開尊以納之投轄以延之一時有孔北海之目
孺人主持中饋婉婉聽從嘉肴在陳供具罔缺自奉恆
儉約而歲之所入必從容計畫使無不足以副先生好
士心十八年如一日也迨先生出宰博陵猶懼以室家
累鄉園井臼躬自摒擋荆布之風依然儒素猗歟賢矣
夫人當食荼茹苦坐歎牛衣未嘗不交深慰藉以爲冀
缺之躬耕梁鴻之賃廡願相與安之也一旦身膺膺任

象服委佗重鼎累茵以嚮爲笑所謂搏節愛養忽忽不知何事矣若孺人之恭儉有禮永肩一心不可爲當世法歟蓋其詩禮夙稟慈和性成娣姒朝夕怡怡如也男女錢布班班如也遇戚族有急則量力賙之不少後下至婢僕奔走亦制以義而懷以恩人之稱孺人者莫不尊之曰女宗書之曰內則而以青匭爲天錫之報也青匭韞才抱道績學能文始以優行貢成均己而慈竹徘徊循陔不忍別孺人教之曰吾體無恙汝讀書好爲世

用母以介特老田間也揆之古人如姜母之寄當歸溫
母之牽行裙其相去爲何如哉青圃旣復入試輒冠曹
行且掇拾朱紫而將母之念斯須未忘往往登高憑眺
南望黔中視白雲起處眷言親舍歸志浩然遂就學博
以返孺人誠賢母青圃亦誠賢子矣景福綿延休祥烏
弈未有艾也
年家子列官於朝未獲鞠脰希謁隨
獻康爵而藻飾嘏詞又青圃所不許爰綴所聞於青圃
者陳諸堂上效黎收之拜云是爲序

張樸齋先生八十壽序

星沅知交半天下其最久且篤者莫如張大雲巖生同
歲居同里長同遊自總角以至於今吐素輸情親若手
足三十餘年矣今夏六月雲巖將爲尊甫樸齋先生壽
會星沅使粵事竣乞假歸省因屬一言以介竊惟壽言
之義要在臚舉行實導揚芳徽以彰令德壽豈之旨非
知之深者不能言雖言亦無當也先生天性仁孝內行
克敦持已恭處事慎接物和居市廛之中秉詩書之度

鄰族敬仰翕然同聲卽當世亢戾之子亦望見顏色輒
心折意下莫敢忤嘗有某夜過被酒遺朱提五十金越
日不復記憶以爲他氏匿之也先生亟持往告其人感
謝分半以酬復峻拒弗納夫人情浮薄好利其故爲機
械變詐以攫取財貨者固不足論至於醉夢瞢騰遺金
罔覺已不自省乃望人取懷而予豈不甚難若先生闇
昧無欺影衾無愧所謂不爲昭昭伸節冥冥墮行卓然
古君子矣準此以推則生平立心行事皎如青天白日

粹如璞玉渾金豈不信哉豈不信哉星沅比肩雲巖論
文過從隅坐之頃教戒懇勤往復不倦旣而備館職司
文衡先生聞之喜而不寐蓋期望之切視猶子弟矣比
登堂載拜先生神明矍鑠飲啖不衰一如往日信乎大
德必得壽期頤之慶有固然者抑吾楚望族以長沙張
氏爲最文章甲第分鑣并驅惟先生盛德自守抗行同
輩所以培養元氣蘊藉光華宏世澤而徵福報者至深
且厚子若孫仰藉餘慶其昌熾正未有艾也敬陳梗概

隨雲巖後更進一觴云

四川鄉試進呈錄序

道光十四年甲午科鄉試屆期禮

臣

以四川考官請得

旨命

臣

李星沅偕宗人府主事

臣

彭作邦往典厥事伏

念

臣

湘南下士學識凡庸由道光十二年壬辰科進士

改庶吉士十三年四月散館授職編修七月大考

欽取二等十一名蒙

恩賞小卷緞四疋初膺史職仰荷

鴻施未效涓埃惟深感悚茲復榮邀

特簡畀以掄才鉅任撫衷循省彌切冰兢謹與臣作邦

馳行抵蜀遵限入關時監臨則四川總督臣鄂山協同

點名則布政使臣李義文按察使臣蘇廷玉提調則鹽

茶道臣監試則成綿龍茂道臣內監試

則成都府水利同知臣強望泰將事秩然罔弗嚴肅爰

進學政臣黃琮所錄士扃闈三試之臣星沅偕臣作邦

率同考官舒翼等悉心校閱得士如額擇其言尤雅者

進呈

御覽臣謹颺言簡端曰竊聞文章之奇與山川相映發
扶輿磅礴之氣其鬱積也愈久其韜養也愈深則其鍾
之於人發之於文者必有非常卓犖超出一世之所爲
以光顯於天下臣自弱歲慕蜀中山川嘗由五溪入蜀
泛覽其東南之勝沿江而歸若所謂三峽二劍之高青
城玉京之美猶未得而徧也今由驛程周歷劍外始略
識其大凡而又得采其精華之所凝聚神秀之所發抒
以證合乎流峙焉夫蜀自文翁教開石室周孔之學始

章厥後文人輩出盛於兩漢唐時陳子昂李白皆昌文
章於蜀至宋而與周程談易學者蜀儒居多遂開南軒
張氏以道德經濟頡頏紫陽蜀學至是乃益大然則守
先哲之緒餘思因文以見道者非蜀士爲最易歟我
國家教澤涵濡邇化翔洽士生其間沐浴鼓舞自有月
異歲不同者臣等不敏盡心力以擇之合薦卷遺卷而
蒐之循流而討源去浮而崇實上者理義明達才氣清
挺如喬峯大江次或幽澹如巖壑雅潤如泉石綜計此

中所錄非敢謂權衡悉當亦庶幾覘所夙養勉爲時彥
冀以登於

帝廷用備任使上副

聖天子樂育之懷此則

臣

之微誠所願與多士相期於

靡盡者夫維時官斯土者則鎮守成都等處地方將軍

臣

副都統

臣

建昌兵備道

臣

川

北兵備道

臣

川南永甯道

臣

川東兵備

道

臣

四川提督

臣

建昌鎮總兵

臣

川北鎮總兵

臣

重慶鎮總兵

臣

松潘

鎮總兵

臣

例得備書

翰林院編修

國史館協修功臣館提調本衙門撰文

奏辦院事加一級紀錄二次

臣

李星沅謹序

湘潭郭氏閨秀集序

內子笙愉錄郭氏閨集旣成將付剞劂而屬予爲序予
惟風雅之彥萃於閨闈遞傳三世揚芳襲采近時湘楚
必推郭氏爲女宗當笙愉來歸出示贈奩諸作自其祖
姑母姑母諸姊妹皆以性靈抒才藻莊雅清麗方之班
左殆無以過外舅雲麓先生數爲予言擬彙刻成集以
志一門韻事忽忽鮮暇嗣又命婦兄南屏錄之而皆不
果笙愉居常慨然銳以此事自任日月荏苒思不去懷

比偕來嶺南內政清暇始郵書故里得諸家全稿手定
去畱各繫弁語裏爲上下卷笙愉於是克成父兄之志
乃欣然自慰予亦爲笙愉稱慰也因念己卯正月予偕
笙愉歸湘潭時兩姑母方同居南屏兄弟亦皆年少氣
盛以予初至相約贈詩索和將邊出奇兵以能事迫予
也予故遲不應瀕行前一夕始爲長歌巢畚衆頗色沮
外舅顧而笑曰李郎能應敵少許勝多許矣旣而南屏
鄉薦捷禮闈十年之間甲科接武吟事日盛曾幾何

時而南屏兄弟先後夭折外舅令鄆縣以憂解組旋卽
溘逝楹書零落遺孤幾然至今閨集一編卒賴笙愉成
之語云衰門之女其信然耶展誦未終又不禁掩卷三
歎也

梧笙館聯吟初輯序

嶺南二載簡書困人僂俛至今甫息勞鞅環碧園竹陰
如水花木蕭疏時與丙子笙愉小憩其中倚石闌啜苦
茗清談消夏始刪定聯吟初輯將去其繁複者纖屑不
成章者所存殆無幾笙愉曰是何足言詩聊以志唱隨
耳若雖鳩之關關螭龍德牧之邕邕自暢其天同聲相
應必操節奏繩之母乃迂乎遂備錄付梓

簪花閣遺稿序

此笙愉丁酉以後作也是年夏六月嶺南使竣哀聯吟
詩爲初集笙愉顧而樂之曰我兩人吟事未艾但視此
刻續至第三集乃可聚聚免災爾曾幾何時而零章剩
句頓成絕響前塵如夢邈焉寡儔天乎天乎非笙愉中
年才盡抑藐躬祜薄不克永唱酬之樂有以階之厲而
蹙其算也笙愉耆詩最篤日手一帙寢食與俱比相從
宦游間以內部署井井間有所作必促和韻不少待予

方抗冗俗幾欲三舍避之而今已矣笙愉詩止於此矣
記昨歲笙愉入汴嘗夢吐絲如蠶漸吐漸竭以爲不祥
何妖夢之踐若是其速予旣爲輯遺詩又歎笙愉長逝
無復索予詩者予亦何忍復言詩耶君苗筆硯螺黛交
焚伯牙琴絃山水淒斷閨房清課回首慘然惟掩卷嗚
咽而已

紅薇吟館遺草序

笙愉旣歿十六日而長婦智珠以哀毀夭蕙妻相望帷
屏闌寥烟墨叢殘塵積寸許越數月始集笙愉遺草因
檢智珠詩附之智珠故笙愉女姪三歲失怙極爲雲麓
公所愛憐雲麓公病篤召笙愉屬之遂訂爲梅生婦年
十六來歸自祖姑以次皆嘖嘖稱智珠賢其端靜愔嫻
根於天性事予夫婦如父母子夫婦亦以女畜之旣隨
侍北行水驛山程卽景成句時與梅生相唱和一門韻

事人以爲難笙愉之歿也智珠病已不勝喪強起續經
晝夜哀號以予屢戒毀傷悲思抑鬱彌深酸楚獻歲朔
日猶爲尊者持誦心經百六十過自是氣喘益甚彌留
之夕呼媽媽不絕口姑慈婦孝竟以死從可痛也幼讀
書過目成誦學爲韻語婉麗自然初奉詩質予命曰紅
藕館吟蘂會見吳中閨秀集有同名早逝者自以紅藕
易之亦僅得年十八非幾之先見耶

澹香閣詩存序

澹香閣詩存一卷女弟淑儀作也淑儀甫數歲聰穎絕人於諸弟妹行劇爲吾父鍾愛父嘗以手撫之曰此掌珠也吾以門楣望汝矣遂受聘楊氏未及笄而父歿家道化離零丁辛苦苦惟環泣日不絕聲阿母髮以當門親課予兄弟下帷績學姊若妹勤操鍼黹稍暇則命就予受讀自孝經論語及女誡列女傳淑儀悉心識不忘間以古詩歌授之則反覆背誦不去口久之試作韻語

芬芳俳側有一唱三嘆之音性善愁賦愁無不工者年
十八歸楊執婦道惟謹詩事漸廢遇歸省猶伏几伸卷
手舊讀詩吟哦終日以不竟所學爲恨然妹壻方少年
銳心文史予兄弟亦次第成立不甘濩落兩姓之興未
有艾也無何妹壻以痘夭嗚呼天乎淑儀何辜而所遇
之慘如此自是蒿簪椎髻顧綳子遺孩以淚洗面已矣
此生豈所爲詩工愁愁遂無了期耶予不悲淑儀之窮
於詩而悲淑儀之窮於命也爰輯舊作詩若干首付內

子笙愉錄而存之

聽濤園古文序

蒼蒼乎松之爲狀也之而盤鬱排雲參天風籟翕噓濤聲噴薄大江駭浪迴瀾激湍颯然起夫林於會不知幾千萬頃也而文心妙爲會之此曹暢庵先生聽濤園古文所以傳也先生六歲能文以聖童鳴譽序稍長闢園松林中顏曰聽濤屏絕人事鍵戶讀書自周秦以迄元明靡不沿波討源同條共貫故其爲文也曠如奧如動與古會涵宏演迤蔚爲大家士無知與不知爭翹首跂

踵以觀著作之成也顧屢躋秋試始以拔萃得校官當
事者遑其名薦鴻博力辭不就而先生老矣然使先生
以少年膺殊遇鴻毛順風一息千里建樹固自卓卓至
於學必如是邃而文必如是醇則未敢信爲兩得也天
之嗇先生以遇天之豐先生以文豈偶然哉當主講嶽
麓時執經門下者得片鱗爪甲率飛騰攫拏以去而先
生正學自任所爲文章一以明道經世爲宗力芟少作
并焚祝祭諸稿几席之暇看雲賦詩登山臨水俯仰自

得翛然風塵外人蓋先生生長資江之濱資江歷邵州
五十三灘源長而流駛清瑩秀澈代興名人以與山川
相濬發余嘗命棹往游小憩白鹿寺遂訪裴公讀書處
見亭中雙竹如龍蜿蜒干霄直上作歌記之尊酒流連
其樂忘返惜未蠟屐聽濤園周覽先生藏息之所而第
於遺編彷彿之也往陳滄洲王虎止兩先生嘗舉聽濤
園古文四卷序而刊之歲久漶滅不多覲吾友張子雲
巖蓋嗜斯集若性命者爰偕同志重梓而屬一言弁簡

端云

玉池山樵遺稿序

吾邑山水清峭如玉笥汨羅諸勝發離騷之幽豔表風雅之權輿先芬所流詩豪鋒起近今以來如周子調臣其最也調臣家貧耆學溺苦於詩自爲諸生讀書嶽麓山偶一藝出傳鈔殆徧顧賦性狷介不與世諧學使邢春浦先生奇其文將列拔萃科旣而廉其品以爲拔萃縣一人不如優行省二人爲足風多士也及例貢優行先扃試試之日調臣竟不赴連應鄉薦亦不售居常殷

憂侘僚狀悒悒若有所病而病遂中之數語予曰君才
大可用若吾輩以諸生終誠不足惜惜與草木同腐耳
語訖黯然予固訝其言之悲而未覺其病之篤也未幾
調臣死矣始調臣與吾宗可北交最密予因之締交旣
偕應科考同受知於許萊山先生擢高等食餼往來日
益親每當酒酣耳熱狂吟繞屋脫略跌宕以爲一時之
盛今十六七年耳萊山師遽歸道山可北調臣相繼化
去師友之間零落將盡言之傷心調臣詩不名一家其

天才橫軼可喜可愕蓋湖山之秀特蘊而出之使天假之年亦烏能測其所至也會子刻郭子芑泉遺詩因郵書調臣家得所存稿并付剞劂以慰亡友於萬一云

周石帆遺稿序

予因家可北識周三調臣復因調臣識乃兄石帆三子者皆吾邑詩雄也而皆不遇皆不永年當文場角逐時可北性豪宕劇飲狂踞人以爲顛調臣率掩抑淒涼落落難合惟石帆溫雅和易清淡如雲所至輒相與投分先子入縣學繼數同應秋試倚裳聯襪把臂論心顧常偉視予以爲讀書經世大用則大效小用則小效若可北調臣將爲山澤之臞也旣而可北死調臣死羅江回

首舊雨晨星所望爲魯靈光者徒有石帆在耳曾幾何
時而石帆亦死矣石帆詩如其人不事拍張而情深調
古頓挫激昂與可北調臣爲犄角調臣詩子旣序而刻
之儼與可北詩合訂又念石帆諸作不自收拾南向惘
惘恐散佚無復存也比兩弟書來乃并獲石帆詩彙爲
一帙且悲且喜昔劉沓虛寄江滔求孟襄陽遺文曰相
如有遺草一爲問家人子讀之嗚咽流涕不圖三子之
遇之年竟止於是徒以半生心血鬱爲菁英俾不才如

子稍盡後死者之責也九泉有知當相向慙然歎故人
久要不忘己

兩福山房遺稿序

郭子芑泉旣歿之明年其孤敬瑗郵所著詩乞余序而刊之憶余初識芑泉在嘉慶丁丑夏偕赴童子試試將竟郡守每縣簡五人局東廨面課而余與芑泉席相屬見其意度間遠顧視岸然知爲非常士也試藝旣就促坐通辭遂定交若平生歡未幾同補弟子員同應鄉貢舉又同授徒長沙往來日益親時張子雲巖楊子芝樵熊子雨臚汪子崑山及余弟西來季眉皆以詩文敦宿

好年少氣盛倚裳過從往往月夕花晨登山臨水酒酣
耳熱長嘯高吟有不可一世之概獨芭泉瞠目旁睨沈
默自適新詞徐吐間以談諧舉坐無不絕倒以爲靜者
心多妙也旣連不得志於有司則買扁舟沿羅湘過洞
庭俯江漢指晴川之雲樹招黃鶴以歸來古思今情縱
橫鬱勃皆一發之於詩詩不名一家大都疏瀹性靈卻
埽塵俗以其曾大父羅洋草爲之先導世不乏知者顧
芭泉不求人知并不屑人知坐是所遇常侘傺其孤介

不諧乎眾性使然也自道光辛卯與余別數執訊道款
曲及奉使嶺南馳書招之又以親老不能至而期望之
厚規戒之切二十年如一日余誠不意交止於此且不
意芑泉詩止於此疏放蹉跎窮愁以終回首前塵如夢
如醉安得復有童場角逐時耶因取遺詩代梓聊紓後
死者之責以誌久要不忘云

道南淵源錄序

東林講學之盛垂六百年爲先賢壇席最始予陳臬開藩往來錫山思一瞻拜未遑也道光丙午巡撫吳中會鄒鍾泉觀察以憂居里偕同志修復講舍增諸生課額具膳局試規制甫定予因道左蠲肅躬詣展謁俯仰間廣大靜深氣象清穆優然有見乎位愜然有聞其聲也敬書道南祠額及書院楹帖識之於時紳佩衿纓雍容莊雅益歎想流風餘澤沐浴詠歌陶成未有艾矣丁未

移督兩江越歲汪寫園工部以所輯道南淵源錄郵書
屬序余受而讀焉溯自宋楊文靖公傳道伊洛歸主東
林程純公目送之曰吾道南矣此道南所由防厥後喻
尤李蔣四先生繼之顧端文高忠憲二公又繼之中間
剝復興替黨禍酷烈而斯道遺緒歷久未墜昭昭乎日
月之經天江河之行地也我

國家正學昌明道脈一宗朱子由朱子而上之爲李延
平又上之爲羅豫章又由豫章上之實惟文靖紹純公

靜觀自得之傳十八載梁谿上下身體力行口講指畫
以廣儒宗津逮是編於性天閩奧推闡淵源而四代薪
傳守先待後宗旨粲焉賅備其與鍾泉之揚世德誦清
芬皆卓然吾道功臣矣豈特講院之式廓賢才之炳蔚
爲東林中興也哉抑又思之勸教興學責在疆吏予不
敏三至江南錄錄無所表見卽錫金二邑糧戶墊追之
弊予於撫治禁革而奸蠹消沮尙冀然灰騰口乘間以
困吾民則教學之大端尤所俛焉如不及者輒不禁景

行太息云

李氏支譜序

古者有大宗小宗之法大宗率小宗小宗率羣弟以紀理族人其時族姓世系皆掌之官辨章親疏經緯圖籍覓乎尙已後世宗法旣廢官書漸失於是閭閻世家自爲記注昭繼序合疏屬譜錄之設重焉吾族自始祖遷伍公由江右豐城占籍湘陰聚族而居已數百歲舊譜渙散浸益殘缺族中諸長者懼其久而湮佚也迺綜述遺聞參考世次纂輯詳審裒爲一編其遷伍公以上世

代悠遠譜闕有間傳疑之辭概不著錄自遷伍公而下
相次爲五代世系圖其後支分派衍別而綴之檢括條
貫較若畫一案圖考課規制畧備復推闡家戒列之簡
端所以示後之子孫尊祖訓重家法也嘗觀古今來世
祿之家冠蓋相望其後繼嗣非類不旋踵而陵夷衰微
遂以不振若夫通德之門世守舊業雖累葉未獲通顯
而卒昌大其後人然則祖宗敦行脩德足以庇賴子孫
爲子孫者宜何如勉自樹立以無墜家聲也唐柳玘述

家訓曰名門右族莫不由祖考忠厚勤儉以成立之莫不由子孫頑率奢傲以覆墜之烏虜可不戒哉吾族本根蟠固生齒日繁內行敦飭相習於善或折節向學砥礪廉隅或盡力耕稼顓務本業歲時伏臘共祀事惟謹父老子弟驩訢相往來凡載在斯譜者咸斌斌禮讓無怙侈無傲戾無惰游可謂難矣星沅賴前人之庇蔭遭時竊位深自忱惕竊幸譜謀脩舉倫紀篤敘敬宗收族雍然見古之遺風所願後之人聰聽彝訓繼繩罔替庶

幾家慶舄奕俾先世仁厚之澤流衍於無窮也

張詩舫中丞關中集序

詩舫中丞撫陝之明年以近著關中集郵示並屬星沅
爲序顧星沅平生詩友於中丞因緣最深宦蹟亦關中
最熟不敢以不文辭關中古帝王都於山見華嶽之高
於水見黃河之大且深伊古以來人才輩出傳之聲詩
名卿寓公難更僕數我

朝開府重望近惟桂林陳文恭公至提倡風雅英奇雲
集則畢秋帆尙書殆稱一時之盛今節署終南仙館卽

當日觴詠地也中丞以文敏家學爲靈巖鄉人騷壇主
盟垂四十載一官一集筆騰墨飛海內知與不知論詩
必推雄長迨由皋蘭秉節盱衡關隴年豐民樂政通人
和中丞檠戟清幽抒情摘景嶽色河聲輝映響答視昔
賢有過之無不及已星沅三度入秦巡撫復閱二歲時
方安輿就養春祺介雅數奉觴舞綵稱壽阿母每月朔
望禮佛觀音閣輒隨侍凭闌眺灞橋西北諸山閒過小
方壺井梧書屋扶掖流覽風日清美花竹娛顏極官舍

承歡之樂獨所得詩無幾申誦斯集鴻泥宛然益歎君
才何止十倍丕也中丞督糧鬲津時星沅使粵假道以
詩代面遂貽畫簃訂交旣而中丞由汴入都星沅由都
入汴乃在漳河南北兩岸相左咫尺千里企想至今讀
集中見懷長句雖羊杜風流未堪方駕而阮嵇夢寐洵
爲異地同心飛潛殊塗雲山迢遞合并當在何時勉志
弁言又不禁臨風嚮往若或見之也